

淮海英靈續集

淮海英靈續集

鄉人阮亨輯

席居中

字允叔錦州人僑居江都王小白村三允叔父敬軒藏富允叔築帆影樓爲過江人士文讎地與鄧孝

成倪永清魏惟度趙乾符徐松之黃交三姚仙期同時  
揀選政國初風雅稱極盛選昭代詩存著臥石山房  
稿

孝威過寓園留飲和見贈韻

習懶東遊日閉門綠楊籬畔似山村久知樂上一枝好况遇  
騷壇四海尊杯裏搖青疎竹影徑邊堆雪落花存來朝君向  
東郊去不用河橋黯別魂

答徐松之以詩見寄

湖洞幾度起相思海內風騷賴主持標格足爲吾道重胸懷  
真與古人期黃金恨少能酬客白髮愁多苦輯詩迢遞一編  
勞遠寄交遊倘不辱追隨

張奇

字正甫江都人  
流寓金陵

廣陵曲

郭外西郊古帝基殘陽紅拂酒家旗行人坐久難爲別芳草

雷塘日暮時

張茂枝

字芝園泰興人康熙  
秘著五葦遊草九子秋吟

進士歷官中  
居諸稿

滕縣

井田不可行古法久淪棄惜此仁人心于滕存其意桑棗有

遺風川原多舊制巍然草間石想見當年事

石碑書孟子  
行井田處

顧

錫

字晚仙  
江都人

揚州雜咏

土藩淮陰事不同當年相業最卑庸瓜洲有宅猶堪賣何故

安涼飯後鐘

孫枝蔚

字豹人陝西三原人居江都布衣舉博學鴻辭以

少遭流寇兵鄉少年奮大志賦落深壑得不死居易錄

云豹人僑居揚川高不見之節予訪之先以詩云集獲

奇人孫豹人新詩雅健出風塵王宏不見

同潛節端木烏知原憲貧遂爲莫逆交

烏夜啼

落葉滿地星滿天霜華初白月初圓北風蕭蕭雁不至殘燈  
欲滅還復燃忽聞啞啞枝上啼聲音酸苦情可憐我愧人中  
之曾參爾豈鳥中之杜鵑起着衰麻拜烏前吾方八歲母長  
眠去冬父亦歸黃泉兩墳只在村東邊雖無狐兔敢來往卻  
少松柏相接連爾能返哺吾不如吾每夜啼爾亦然不祥恐  
取鄰人惡好去別棲高樹巔

怨別

少小人君室衣食正豐潔貧賤尙不知何況知離別在富反

相守居貧忽東西悠悠萬里路天道安能齊冬風寒游子春風傷空閨如何改歲時各爲風所悽增君身上衣減妾口中食君不及早歸妾飢誰可測

古別離

別君六月中冰盤浸碧藕思君八月時寒河照衰柳時節忽復易綺羅向誰守君去衣未去欲寄徘徊久吳越有佳人文綾出織手故情苟不薄新衣何妨厚故衣留妾邊亦得親君

無新衣寄書獨何後

雜詩

辱與貴同至賤爲福所環君看車輪摧多在太行間日月有出沒海潮有往還奈何名利心擾擾不知閒李斯受五刑流淚空潺湲同時四老人歌聲滿商山

閒居感懷

寸土能生草寸燭能照人丈夫在高位何以利乾坤被服美  
衣裳舉族多懸鶉往來乘駟馬骨肉困風塵所親尙如此功  
名焉足論君見晏平仲慙愧七尺身

泊舟毘陵觸目有述

傍晚朔風急哀鴻斷幾行孤城寒水氣敗屋出燈光憔悴南  
來客艱難北運糧誰知垂老淚翻不爲思鄉

輓張廉侯

獄中詩更好讀罷斷人腸猿哭聞中夜鵲啼在異鄉何時明  
罪跡能不悔詞場江上慈親老終朝淚萬行

同孝威仙裳田授飲趙乾符郡丞署中

官閒永夜喜論文座上高陽總不羣且和吟梅何水部休歌

行路鮑參軍江湖歲晚書難達鼓角天寒老厭聞幸遇主人能愛客平原十日敢辭醺

焦山遇風作

風起中流浪打船秦翁失色海雲邊也知賦命原窮薄尙欲西歸太華眠

同方爾止吳仁趾陪吳蘭次登多景樓時蘭次將赴湖州

出城送客共躋攀萬里烟雲杳靄間天下江山如此少古來冠蓋幾人間潮頭日午添帆影樓角風微散酒顏五馬臨行重回首故知魚鳥最相關

殷

璉

字雨蒼號荊石江都瓜洲人諸生瓜洲志云璉父

瑞五明經任義好俠璉體父志慷慨立名節詩古文詞入大家堂與不妄交不輕向人道隻字今但知將

熊魏王諸子少知璉者恨事也著三山游吳門紀

留宿周天池齋樓

真氣苟不存胡云心相知對君耐久坐宛如髫年時開閣話  
尊酒明月來遲遲永懷照古歡松柏以爲姿

松柏長千尺歲寒良不凋萬蘿自依依托交何逍遙人生壽  
幾何詎毋重久要但聚卽爲歡相與永今朝

時聚不徒酒以酒聯夙情況復對伊人溫其如玉璽有子亦  
旣足有書不爲貧藹然庭除間佳氣敷春榮

春燈照新醅餅梅生古色落雨閒人會心咸自得豈世不  
足語語時恐滋或達者蘇頌兒長齋醉彌勒

君固耽古學予亦僻狂吟於世何所希聊以濯塵襟一琴一  
樽酒醉歌忘夜沉歌罷忽大笑明月知我心

雪霽月明感懷二三亡友因用明月照積雪爲韻



江郭夜寒悄虛窗生空明獨坐試開軒忽起故人情故人不  
可見遙遙孤鴻聲

朔風吹亂雲青天吐涼月舉頭一悵望低頭情欲絕詎無新  
相知古歡良可惜

寒夜一杯酒上下幽光照昔者結同心今者寡同調茫茫天  
壤間悠悠發長嘯

人生聚會艱等之浮雲積浮雲忽以散誰者留真跡我思若  
爲情一片江天白

想其把臂時醉月復醉雪雪夜月如此伊人何遠絕生別奈  
若何嗟哉更永別

醉雪歌立春後二日飲楚濤山堂作

有酒不肯醉空貽後世羞况當雪光皎皎如飛練何必矯學

獨醒儔一心萬事攢閒愁虛此層疊之瓊邱我有好友徐南  
州高臥山中袁安流閉戶不肯說朝市著書常吐五鳳樓下  
交于子何綢繆一日不見如三秋清晨破雪扣其戶相逢一  
笑解驕裘驕裘換酒爲君壽願君千秋三不朽君是梁園之  
枚叟愧我獨非司馬偶拍板狂歌不自知世人那得評好醜  
十年白眼風塵走忽漫相逢山水友一杯一杯傾數斗翦翦  
冰花大如手想君能作白雪詞白雲流光入盃酒莫謂學書  
不成名漢家王侯多功狗莫謂長安多富兒白日衣冠夜妾  
嬾君不見珠在淵兮玉在藪自古神龍不見首遁跡邱園豈  
株守安得逢人開笑口且須痛飲雪中花一醉天下事何有  
乙卯病中聞楚濤病走筆慰之

君不見秦楚荒於兵又不見吳越荒於水高田爲圩低爲湖

少年愁生老愁死蒼赤到此無完軀誰得逍遙天地裏今我  
病骨苦峻嶒何復聞君亦如此撫髀一聲長太息放眼觀之  
翻足喜天下幾人能棲閒塵氣爲之一浣洗枕書高臥夢羲  
皇藥籠中物堪依止幾時曳杖一相從莫學太瘦生可耻且  
傾秫酒醉花前西南之交尙爾爾

春陰登維摩閣用楚濤韻

積雲妬春色入畫忽冥冥山亦偶然碧天于何處青寒花空  
野寺古木自荒亭相對無塵染栖心久立銘

中秋夜月同周聃友

江城飛玉鏡月滿恰中秋一片青天裏都爲碧水流饒歌喧  
石塔燈火亂漁舟亦自消岑寂開尊敞庾樓

送別朱梅壑山人

把袂聯吟曾幾日奚囊話別又天涯霜殘楊柳堤邊色夢冷  
芙蓉江上花望裏山光應滿載興來詩句落誰家元龍湖海  
元高曠最是秋深慘物華

楊廷鎮

字爾琮號岷樵江都人儀徵籍康熙甲子舉人官訓導著集鱣堂岷山堂詩集

樓成

置身百尺樓四野遙相望望遠天逾低居高目乃曠以此慨  
流俗所見礙塵障何當攜手登指顧雲霞上

雪霽訪宗梅岑用孔東塘韻

古寺近城隈城烏入寺飛相看天欲雪誰慰客無衣野興清  
貧得知音感歎稀新詩持贈我諷咏破愁圍

蕭

明

字照千江都人

送汪悔齋太史出使琉球

猩袍冉冉下蓬壺獨指蒼島嶼孤欲使文章傳瀚海特將  
天藻命真儒蠻荒下識周官禮仙仗遙分漢殿呼踏破蛟宮  
消蜃氣六龍千載莫瑤圖

季永鈐

字子席號惕齋江都瓜洲人諸生與倪永清友善

陪宋旣庭登金山

嶒嶸怪石聳波心面面危樓俯碧潯水色蒼茫秋樹遠山光  
迢遞晚烟深中冷泉冽塵堪浣望海亭空月欲沉愧我追隨  
逢絕境風前把酒一開襟

登潮音閣

高閣臨江渚蕭蕭竹樹間窗虛明月動山靜白雲閒荒園秋  
無主柴門夜不關憑欄一長望人在米家山

九日集于園

南鄰北郭動高秋，忽漫黃花插滿頭。  
臺閣那應巢翡翠，林塘猶得坐箜篌。  
六朝史筆空茅屋，十載書痴老敝裘。  
縱飲題糕狂欲絕，龍山何處續風流。

李炳石

字存齋，興化人。梅子康熙丁卯舉人，官雲南曲靖府同知。

第五泉

山泉標第五，清冷鑑毛髮。  
扶筇陟孤亭，落葉响林樾。  
隔江數峰青，我懷自怡悅。

李亦文

字江衣，泰州人。受業于鄧孝威。

送王自牧學博之淮上

江聲千里碧幢分，十萬軍儲過水濱。  
鐵角夜吹刊渚月，樓船秋泛幾湖雲。  
徵輸自合勞民牧，飛輓何當責廣文。  
此去黃花孤驛晚，雁羣嘹唳那堪聞。

劉

彬

字季蔚號景山儀徵人景山豪俠自雄嘗領囊解  
時困游豫章值尋關移駐排難陷獄時大中丞引

為疏首以全多  
赦歸時目為小仲連著山響樓集

謫戍池陽同宗鶴問仲氏子發登齊山

落落天涯已有年此來何計定良緣  
千峰樹色搖殘照萬頃湖光蕩暮烟  
景物足追陶栗里風流猶憶杜樊川  
可憐遣戍無歸路賦得新詩獨惘然

長至日集汪秋浦齋中

天涯兄弟坐深堂話舊當年思欲狂  
卻看飛灰思故國最憐征雁是他鄉  
樽多為風塵減冰雪何辭道路長  
望裏南州誰下榻扁舟聊復度鄱陽

秋夜與家山立廣文坐話

握手鱸堂已夾旬夜闌深坐語相親  
侵階月夜橫巖戶入暮

秋風動旅人舊事未能忘所約宦情應是守清貧  
風塵滿眼悲無盡前路蒼茫那問津

魏嘉琯

字鳴玉號西來江都瓜洲人尹宏子詩飄逸响亮在朝水襄陽間著飛雲閣集

真州道上

新城遙望遠緩緩轉山坡天雨隨鞭落江風送客過  
郊原人跡少幽徑鳥聲多誰復憐同調相將一放歌

仲冬倪永清偕諸同人集熊以介齋中

初晴天氣思悠哉雁影橫空直北來我輩風流何落魄  
山翁耕鑿本雄才倚窗漫話雲間事把袂還傾江上杯  
知己相逢懷抱愜紛紛愁緒一時開

梅花嶺

漫道羅浮夢裏仙廣陵春色自年年官曹有賦今何在  
半嶺



梅花一嶺烟

隋堤

官軍錦纜幸揚州  
柳色成春煬帝遊  
試聽黃鸝枝上語  
聲聲都作舊時愁

瓊花觀

斷碑古寺剩繁華  
送盡殘鐘日影斜  
露冷離宮人寂寞  
空餘明月照瓊花

徐起霖

字傳巖號巖叟通州人康熙己卯舉人官真定府知府著同善錄訓戒諸書

宿古浪驛和暴玉溪

聲教徹戎疆  
要荒若故鄉  
忽看天外月  
增我髩邊霜  
風勁蒼雕落  
川迴白浪長  
驛樓岑寂甚  
投宿暫空廊

聯生兒

兒父王華陝西三原人

混沌從人鑿茲兒迥異前生愁沉下土得竅卽先天頭觸媧  
能補耳空老失年來途休過認化育自無邊

王

錦

字文度號湖舫泰州人心齋入世孫少孤苦嗜學  
黃仙裳妻以孫女隱居南溪嘗曰閉戶卽深山何  
必桃源絕境乃可

避俗著贈白廬詩

送月舫先生授經峙東內叔月來閣

海內聲華著有年燃藜真不亞前賢杜陵過日詩爲事陶令  
傳家硯是田自有琴樽消日月漫將書劍托林泉定知北阮  
親南阮沽酒從今不費錢

春雪

早春風雪轉漫漫愁倚衡門思百端遙想朱樓揮酒客那知  
白屋有飢寒

閔

崧

字子天江都人象南第五子由監  
生任理藩知事精騎射著江上草

玉山讀天谷上人詩

江濱山寺好從遊烟景南徐屬早秋窗外蟬聯高樹響門前  
風急大江流偶來信宿同錢起得讀新詩愛惠休更喜中元  
今夜月二分依舊似揚州

張懋京

字元標如皋人少孤  
事母孝著蓬經集

雪夜

瑞雪夜飄飄風聲勝昨宵梅稍知漸重塵夢已全消一室生  
虛白三更破寂寥袁安尚高臥莫負酒盈瓢

張雲鵬

字子萬號快園江都諸生學於陳徵君負盛名明  
季監軍御史王雷臣徵授叅謀國初爲浙閩豫

楚諸督撫叅軍建善國澤民條議書成卽歸里子香居  
最菴皆成令器著香綠閣青來亭詩集飛筆齋愛秋軒  
文集補山園  
雛鷺閣曲稿

閒吟

豐年足酒時還醉世路無媒老便休貧到賣文羞應俗醉來  
歌曲不知愁肝腸白雪非磨涅踪跡青山任去留欲做米家  
真墨本幾回烟雨上重樓

張

鎮

字天立號靜菴新安人居江都萬覺菴云天立精  
兵法穆大將軍聘入幕府獻破賊策旋授參佐謝

歸侍父旬如探秋每下潯陽淚對月多成  
梁甫吟足徵胸次著夫容波集武畧心書

### 留別浦塘諸子

不放浦塘棹於今已四年忽逢歌嘯客又醉別離筵夢繞三  
山路心懸萬里天片帆邗水上花鳥共凄然

### 大觀樓

樓倚孤城繞薜蘿金焦倒影蘸鯨波半天日落中流晚萬壑  
秋生老樹多烟冷遠灘飛鷁鶴濤奔隔岸走鼉鼉隨風畫角  
鳴京口髣髴年時出塞歌

題畫

一溪流水漾晴暉  
柳色青青染客衣  
行到碧桃山盡處  
無人知是白雲飛

張

壇

字韻仙號最菴江都諸生勿讀書過目成誦十四  
工詩見賞於笠翁著江海游詩鈔最高樓文集來

笑堂

詞稿

病後寄陳倩公

落落浮踪感聚萍  
年來書劍倍伶仃  
三秋扣鬱頭將白  
四海交遊眼未青  
芳草無端迷去路  
好花依舊發空庭  
病餘何可消磨處  
枯坐焚香讀道經

舟泛紅橋

兩岸垂楊綠映天  
扁舟一葉破蒼烟  
雲生几席重吟咏  
日落樓臺尙管絃  
江北繁華憐此地  
竹西舊事憶當年  
過橋小泊

蓮花埂爲訪平山第五泉

采石磯夜發

扁舟欲下石頭城羊祜曾經此駐兵二十年來多少事只今一半付江聲

賈

珩

字玉行號東瀛高郵人其音子康熙己卯舉人年十六獲雋相傳前世爲丹霞觀僧卒年二十嘗夢至一處顏曰丹霞衆僧皆羅拜有老僧揖曰大士來乎十餘年不見矣臨別贈以詩玉行和之醒作異夢記

夢中答丹霞觀老僧

幽居無事掩柴門僧梵微聞遠市喧清甃瓦鐺烹石屑空山懸瀑溜松根自憐幾載風塵苦猶喜當年故舊存此去人寰難再晤相期何日返仙源

盛如桂

字仙友江都人

平山堂

草樹深春色凭闌儼畫圖如何留勝跡翻遣寄浮屠使仰成  
今古江山半有無村姬茅店裏壓酒喚人沽

蕭龍章

字雲五  
江都人

六月雨中梅岑次功醉白月樵集見山樓卽送梅岑歸

東原

參差竹樹雜羣芳六月山樓暑氣忘暮雨坐連青草亂涼風  
衣染綠陰香東原送客逢騷雅清夜論詩結露霜想到芙蓉  
池水上垂楊深閉讀書堂

季

愈

字退如號秋浦寶應人康熙庚辰  
人官庶子愈父爲豫東湖西奸民劉某謀不軌令

敗試第二

窮治其黨愈父搜其家得一冊皆素知其名無不法狀  
勢不敢匿波湖伴失足墮水一冊納行泥中皆獲免愈  
及第人以爲陰德所致愈存升庶子督學  
廣東鼓吹過里門人皆羨之見揚州府志

贈別劉雨峯出守真定

東風陣陣燕山路芍藥初開鶯語碎飛絮成團撲面來夕陽  
柳外行人去使君逸氣何翩翩粉署爲郎幾歷年分符典郡  
守鉅鹿股肱四輔稱豪賢青門祖道傾畿甸風流太守人爭  
羨五馬朱幡照眼明行看化雨隨車徧有客停杯望遠天驪  
歌唱罷獨淒然半畝荒園留我住一竿落日爲君牽年來閉  
戶紅塵裏編籬蒔藥呼知己典衣沽酒對春風剪燭分題與  
無比詩成喝起月當頭擊鉢狂歌白更浮夜合香庭同賞夏  
蓼花書屋共尋秋君今出守傷離索蒼茫令我情懷惡尊酒  
論文誰復同暮雲千里空搖落臨岐握手重叮嚀屈指龔黃  
續政新知君奏最

承明早

禁苑花開再卜鄰

賈其章

字質夫高郵人明侍御史先春孫子邦楨康熙壬午舉人官和州學正文章孝行皆爲世所推服

文游臺冥集



步屣尋佳勝高臺曲磴通雲屯蒼翠合日射白波紅文藻江山助魚龍窟宅雄風流如未歇千古一樽同

宮壽平

字昭安泰州人夢仁長子著靜敬堂詩集

議復靖海樓

東南形勝峙神邱文物由來最上頭何事高堂空茂草幾人長嘯漫登樓斗牛尚有衝霄氣棟宇能無借箸籌他日丹梯憑眺好海天一色望中收

翁

伊

字莘田通州人詩見萍水聯吟集

送潘悔橋歸天臺省墓

七年重聚首幾日又分襟俱是萍踪客天涯共此心

黃

基

字宏先歙縣人江都籍

答交三弟見寄

話別殘春裏人歸入夏初時艱悲去路歲晚喜來書竹屋烟  
光靜茅簷梅影疎廣陵新酒熟莫戀海東魚

朱

賢字莘田  
江都人

郭烈婦墓

日堅磨不磷日白涅不淄若不逢涅磨堅白何由知氏乃貧  
家婦冰玉方其姿自分守終喪豈意狂暴窺志在不可辱歸  
潔無疑遲芳華斷尺縷俎豆馨崇祠歸歸蜀岡土貞骨多函  
茲青邱後先峙堪並霍與池高松白日暗宿草秋露滋大書  
警薄俗六字墳前碑

宋

楷字墨池  
東臺人

聞雁

颯颯西風淡暮雲沈寥天氣對斜曛鄉心已自難排遣那得

餘愁更送君

錢

岳

字五長號循  
咳通州人

遊虞山拂水巖

絕巘臨風客思豪蒼松頂上立波濤水珠倒激嵐光濕山練  
斜飛曙影高陟彼崔巍胸漸拓感殘興替首重搔劍崖况復  
誇奇絕欲向飛仙借羽毛

郭

涵

字海若江都  
人副貢生

題因樹樓

因樹之樓何亭亭杏花一樹開當庭特起窗楹寄思慕更生  
枝葉傳光靈高入青雲接雨露東連蒼海流芳馨淮海維揚  
多勝蹟載此節孝光圖經

朱

珏

字二玉號刊樵臨清人  
江都籍著寶翰堂詩

初秋遊真州江深閣

不聽江聲又十年重來已改舊簷椽好風茗國來秋漲細雨  
蓮塘咽午蟬波浪極天低燕翼烽烟西楚滯人船誰能攬轡  
澄清去好種青青郭外田

蕭廷瓚

字文襄江都人維堅子孝子日瓚父皆以孝載郡志三世篤孝古所未有

哭兒日瓚詩

侍藥已更殘號天乞母安挺身三割腹揮刃兩披肝血濺于  
秋碧聲聞六月寒孝哉吾仲子舉世應推難

卞咸和

字雍萬江都人康熙癸未進士官嘉興知縣

立冬集平山堂

斜陽西墜月升東據坐揮毫興不窮檻外風傳疎樹裏筵前  
人醉薄寒中江蟠吳楚波聲遠山接金焦暮影空自管風流

推六一清詩响答古今同

左維垣

字衆堅江都人著薛床集

舟行雜感

鎮日舟車總未停十年書劍半凋零行人莫向秋江泊落葉鳴蟲滿驛亭

汪

馥字舟山號箴堂江都諸生

暮秋感賦

生計慚吾拙行藏勿問天未工司馬賦誰假尉遲錢白髮高堂暮青衫遊子憐不堪佳節近鄉思又經年

張

垓

字鍾奇號霽居江都人幼穎悟貌莊量洪不干榮進或促之曰讀書達道豈在是與結緣水蓮花社

講性理論經術陋巷簞瓢致足樂也著半醒園詩集謬謬堂文集

大哀篇

白日正天中狂風倏忽起啼鳥自啾啾虛堂花竹裏迴想七  
年前景物多如此木折與山頽一朝分父子端坐逝悠然臨  
終無別語示我囊中書隻手慙慙指汝能念在茲吾死如不  
死哀哉自竈窆家業渾如洗牛馬走風塵居諸惜流水投筆  
遇窮途敝裘歸故里寂寞閉茅簷形骸真若毀嗚呼我親存  
我仍墮我志嗚呼我親亡我難行我事躑躅昔時情恍惚今  
宵意涕泣立中庭遺容不忍視

家園

仙子三花樹吾家半畝園寂寥生逸思剝啄斷塵喧雨過蒼  
苔路秋來薜荔軒石牀書可讀此外復何言

留別里中諸友

黃梅雨過晚涼天卻怪無端別緒牽酒醉平原方十日琴聞

流水足千年見愁夜半飛烏鵲忍聽天涯哭杜鵑爲語諸君  
如有意莫教鱗羽滯雲烟

張宗乾

字健麟號水男江都人著聽雨軒集

贈殷雨蒼

卓哉隱君子胡爲世所棄山水本其情雲物爲其氣潛此草  
莽中懷抱英雄器讀斯卷中言幽深含妙義別有經與綸不  
事雕蟲技慚予蠅蟲才願附青雲驥

秋日友人招飲家善長園

古寺鐘聲晚輕舟任所之秋風回短棹明月送新詩醉愛花  
開處眠當雨過時主人呼不起窗外漏聲遲

汪

銘

字書常號枕濤江都諸生豐城萬蓮漪云金山名

切不移書常有一天波影搖漁火  
萬里秋聲壯海濤亦雄雋可喜

同潘次耕太史登江天閣

長嘯登高閣，乾坤氣不分。山連三楚澤，樹拂六朝雲。帆影中流亂，濤聲入夜聞。憑欄恣眺覽，况乃醉醺醺。

楊

縉字夏紀號臥村江都諸生

擬古

華歆名亦重，鋤金見優劣。管疑同學輩，出處天壤別。歆時守豫章，賢聲頗高潔。何意歸曹瞞，坐使伏后滅。時旣不可爲，胡不歸林樾。貪祿附奸亂，其罪豈能缺。見道固不篤，見義復不決。鴻鵠入青冥，驚雀徒喋喋。

郭

銑字山題號冶峰江都人士璋子康熙癸未進士官

行路病次瓜洲發聲大慟嘔血如湧而卒

立冬日集平山堂



江風初冷不勝情  
古寺頽陽放晚晴  
木落坐看沙鳥沒  
堂高直與遠山爭  
紅驚老眼霜林色  
清入禪心梵唄聲  
未惜馬蹄歸路緩  
銀蟾如水薄寒生

蔡孕環

字公珍  
泰州人

春日同謙龍此度穎士飲西山分韻

一望浮青靄  
山光漸已春  
登臨纔此日  
歌嘯復何人  
城郭餘飛鳥  
乾坤老戰塵  
且休談往蹟  
樽酒坐荆榛

贈歌者

憔悴天涯正此時  
黃昏鼓角亂鄉思  
也知崔九岐王少  
懶唱江南紅豆詞

顧元標

字文菴號天  
飛江都人

哭俞人望夫子

短榻橫琴夜不眠空庭明月自孤懸執經回首春風杳不過  
西州亦愴然

賈日近字孚遠號恒菴江都諸生築西山別墅日與樵夫  
牧豎臥月吞花寄情詩酒王文簡司李揚州時最  
器重之

九日獨酌

古人我所懷其骨今已塵今人雖與居對面如越秦俛仰西  
壑下斗酒聊可親徑菊時作花相對成主賓頽然忽就醉不  
覺白日曛白日不再旦朱顏不再新冉冉百年內終古稱遺  
民

賈國維字莫坤號千仞高郵人良璧子康熙  
丙戌殿試第三人官翰林院編修

御試河堤新柳

官堤楊柳逢時發半是黃勻半綠遮弱幹未堪春繫馬叢條

且喜暮藏鴉魚曾渡口霑微雨茅屋溪門襯晚霞最是鸞旗  
紫繞處深林搖曳有人家

卜汾陽

字雲郭江都貢生官高淳教諭

集許氏潯園

燕雲吳岫酒杯前客聚星辰不偶然十里大堤黃鳥樹小橋  
流水白鷗天賞心朋輩留春月過眼桃花滿畫船異地相逢  
先惜別肯辭沈醉竹籬邊

瞿良士

字煥文號唐民如  
畢人著一誠堂集

送別楓江陳殿升之都門

縞紵情深兩月餘驪歌忽唱轉躊躇鶯聲夾岸迷征馬柳絮  
含烟繞客車千里關河成遠夢一窗風雨寄離書旗亭杯酒  
無聊賴何日相將問舊廬

黃鸞祥

字瀛客秦州人  
仙裳孫交三子

王浩川昆玉招集竹里同外祖宗梅岑國博孔東塘先生及家祖家父卽席分賦

廣陵雨歇尙餘寒躡屐招尋春未殘曲浦漁舟吹笛過畫橋  
烟樹隔山看閒邀好友同高詠靜對芳梅締古歡此際幔亭  
投轄處不妨剪燭且盤桓

施

悅

字念山號通民江都人卓子任貧錮鍊不能出手  
通民感其永訣之言爲付剗剗世謂千古無此友

送平子家二兄北上

秣馬春風復遠行數千里路一身輕江淮凍解花爭發燕薊  
霜凝草未生縫線莫教懸母望解衣聊慰送兄情曾傳北地  
多游俠應有奇人遇

帝京

遣懷集杜

百花潭水卽滄浪花撲玉缸春酒香  
比年病酒開涓滴暫醉  
佳人錦瑟傍

杖藜徐步立芳洲更有錦江銷客愁  
南市津頭有船賣老夫  
乘興欲東流

江

濤字有聲號秋觀如舉人同巢民嘗稱其文章意氣爲年少白眉著海棠巢集

過海陵晤王野亭

王子才名久相違迺出羣氣平江北月愁入海東雲酒盡秋  
初足詩成日未懸佳辰應不負落葉正紛紛

劉

坤字簡卿號石樵江都人學文於魏松隱學詩於倪永清

晚步

緩步西郊外行歌一愴然濤聲千里月秋色萬山烟積雨窮  
村舍幽花冷洞天空嗟盤古墓荒草夕陽邊

王

鶴字九皋號野亭泰州人心齋齋工騎射精太公陰符與黃鰲江徐草亭朱雲士穆蒼然張克謙詩次

唱和著

松軒集

暮春過黃上木別墅

王又村注上木仙裳子

春日閒遊過竹西青青柳色四郊迷長安多少浮沉事不及

君家雨一犁

張映室

字文宿號丹崖儀徵舉人官司李著紉蘭集

和談長益

王小村注長益名允謙丹徒高士

客懷難具迷尊酒且同傾慰我還家夢憐君破浪行身閑容入道意熱尚談兵終歲空林下憑人說宦成

王

醇字先民江都人著雲籟集諸家選本皆采入國朝今從之

夜集陳師仲園亭

躍靈促飛轡逝水無旋期因之愜朋友樂宴夜忘疲紅粉環

廣坐玉體無停厄七盤妍妙舞鯁絃清且悲華軒俯金塘颯  
颯涼風吹嘉魚躍圓波素月流清暉懽悰在茲夕不醉徒爾  
爲咄嗟身後名達者焉用之

朱鳳臺

字慎人如皋籍靖江人康熙丁亥進士官阜平縣  
族擢兵部車駕司以終養歸優游泉石三十餘年

輯江陵直解元本醫學集要閩媛法戒正  
蒙錄退思堂等書殆有學有守之士也

贈某叅戎

飛將挾雕弓翩翩氣自雄揮戈殘照裏射雁碧雲中風急馬  
偏疾刀腥血半缸封侯憑俠骨所向有奇功

過山寺

樹隱一峯峭疑無路可從緣溪纔得徑迴步忽聞鐘小鳥訝  
行客老僧扶短筇幽尋余未得無乃愧長松

閱荒紀事

披榛歷道墟曲折審細路懸崖寒風來蕭蕭白日暮乃逢數  
廛老見人轉倉遽問彼舊間井云是烟生處此俱音名里丁  
男最繁裕每歲輸必先淳里昔官譽自茲被兵火骨肉少歡  
聚親朋殺傷盡強者售生去昨朝有信還聞亦踣淵泐不幸  
猶苟存傷心愴所遇無人耕陂田餉腹賴草樹憐我衰老骨  
縱死不及墓辭罷淚縱橫復前致款語辱此爲孤塲奈何少  
供具嗟哉此生人設官尙安務幸達當事聽不責言者誤書  
此俟仁人得無少矜恕

張元珙

字瑤房  
江都人

席允叔招飲黃鶴園

園園依水細通潮酒碧泉香花正嬌愛與素心深買醉時逢  
佳日好相邀雲連遠岫青環屋徑接垂楊綠過橋秉燭歡場



樽俎亂畫樓明月况聞簫

葉彌廣

字博之江都貢生善書博之氣節高介與強惟良夏元長時稱博學一日雪滿庭堦欣然浮白賦詩

盤桓竟日忽訣家人日吾逝矣年七十五

雨中清明

昨宵氣暖疑蒸雨况是清明豈易晴風俗久虛傳火事郊原  
又負踏青行酒家花底誰開甕舟子堤邊自聽鶯縱使游人  
難出郭也教歌吹滿蕪城

李

蘅

字杜若江都人

初伏同諸子訪槃叟

無鄰江上寺來與故人期暑退因山雨閑來有墨池摘瓜充  
客饌牽棘補園籬竟日此中趣都歸石上棋

程應鵬

字翼天泰州諸生詩如翠壁插天蒼松積雪著綠蔭閑集

空碧亭夜眺

路出重林外，長江一望平。  
殘鐘催月上，遠火雜星明。  
人在中流坐，潮來四面聲。  
如何天路近，不見有吹笙。

秋日憶戴景韓

念爾故鄉遊，帆開紅蓼秋。  
宣城多酒市，浙水少羊裘。  
渺渺江空濶，紛紛客去留。  
何時來此地，尋我話離愁。

梁衍泗

字實應人

平山堂春眺

蜀岡春晚淡，晴烟極目凭。  
高夕照前，廿四橋邊回輦路。  
堦棠花放自年年。

趙參

字旭川號雪蓬後徵人

雜詩

千金購寶刀，刀上負心血。從前恩怨施，客氣徒瑣屑。熊熊迸餘輝，厭厭樺燭滅。十年挂牀頭，肝膽照如雪。

程泰象

字仰公，休寧人。泰興諸生，著蔭園詩集。

贈山陰黃儀逋

吾愛黃夫子，生平善自操。聲名空四海，詞賦壓三曹。陋室顏淵巷，湘潭屈子騷。傾壺仍不醉，滿腹是醇醪。

朱光巒

字青嶽，號竹村。泰川人。艾人子。劉玉少壻。竹村神致如蘭，詩得漢唐遺法，著牧鶴軒近詩。

瓜渚曉發

放棹烟波裏，漁歌聽榜人。孤城猶月色，獨客正風塵。山寺鐘聲早，江花野店春。昨宵瓜渚酒，歸夢幾回真。

妙高臺步月

玩月名山好，江聲上古臺。望中蜃氣接，空外暮烟開。入夜潛

龍出臨風老鶻哀因同高衲話茗戰不知回

酬筴江上丈

遊跡名山歲月遙多君相訪動輕橈

時予讀書焦山

著書頗愛陶潛

酒弔古頻尋許渾橋兩世情深蘭譜在百年人憶桂叢招江  
干種藥身將老回首京華夢亦消

保

觀

字雲崑  
通州人

寒雨

凍雲如墨壓天寒離思茫茫集百端欲折梅花尋舊雨卻愁  
驛使濕征鞍

白屋青燈夜欲闌蕭蕭凍雨伴更殘兒童莫訝熏鑪冷昨日  
前山雪更寒

程中莛

字午卿號嘯堂休寧人  
居江都著長嘯軒詩稿

淮海英靈續集

已集

卷三

贈姚字尹

傲骨峻嶒媚骨無翻教俗眼目狂夫詩名久已空諸粵

字尹著粵

遊寄語還應待買沽

程

澎

字飛濤江都貢生候補主事

泛舟平山送吳野人

明朝各南北今日且登臨雲靜青山近鶯啼綠樹深貧交離別老僻壤雪霜侵海水知無際思君一鼓琴

程

湄

字在湄江都人

過艾陵湖

湖水濶無際蒼茫兼落暉客帆東北下水鳥去來飛木脫孤村出烟生遠浦微漫愁烽火徧此地有魚磯

吳志祖

字立先號愛廬江都人蓮子貢生官宿松訓導

送汪悔齋太史出使琉球

萬頃滄波氣象開  
中山遙望興悠哉  
梯航久納名王貢  
車馬親從漢殿來  
午夜星垣瞻視草  
春風侯館待吟梅  
揮毫好向歸朝日  
傾倒坡公海外才

程

庭

字若菴  
江都人

和李環溪集平山堂望江韻

踈磬茶烟僧院閒  
雨餘初放隔江山  
半篙綠影籠清靄  
滿渚紅衣散醉顏  
相賞每多泉石意  
高吟偏向竹松間  
歐陽定有遺碑在  
剔徧蝸涎碧蘚斑

方

苞

字白英  
泰州人  
著夢羅浮  
鄴隱園兼葭清連諸集

送宗瑗度歸秦郵

向晚孤篷細雨中  
前村霜葉一燈紅  
不須兩桹衝烟去  
自在

中流任好風

禹之鼎

字上吉一字尚基江都人興化籍嘗遊京師以善畫充奉內廷授官序班非所好也最愛洞庭山水欲居之朱竹垞贈詩有君去西

峯先相宅小樓容架滿船書之句

送如臯范心淵乞假歸省

滿巖紅葉似芳菲正好尋詩醉不歸十丈軟塵離酒伴一肩  
著作裏萊衣投閒故國心難遂乞米長安興已違但得侍親  
茅屋穩必須買棹更相依

丁

倬

字彼雲江都人

喜兒子至

悲歡一見兩情殊再拜堂前手自扶次第平安詢母妹從容  
語笑到孫雛魂驚連日江濤惡體怯秋風病骨癭莫向阿翁  
感憔悴年來贏得白髭鬚

汪

誠字淵溪  
江都人

議復保障湖舊蹟

廣陵西北隅有湖隘於沼壅塞自何年曲岸榮荼蓼豈惟失  
地利兼之縱遊眺何當事疏濬朗鏡開清曉魚舸漾輕波點  
點烟帆小

汪

宣字汝爲  
儀真人

舟泊金山

不覩名山久西津喜放舟妙高臺畔月洗出大江秋

凌元鼎

字蔚侯  
江都人

登真州城樓

獨上江城百尺樓凭欄吟嘯動鄉愁那堪潦倒金尊客更聽

淒涼鐵笛秋



方

淳

字樸士號去欲欽縣人居江都著正聖學書環翠軒集樸士性孤癖卜築二十四橋黃九烟吳蘭次

鄧孝威宗定九倪闇公皆  
擊節稱許見盟鷗淑筆談

秋閨

極目霜天雁影愁  
擣衣橋畔水悠悠  
夜深消瘦無人管  
明月珠簾獨上鉤

淮海英靈續集

鄉人阮亨輯錄

黃

琯 字臥山 福建人 泰州籍

秋晚遣興

盡日浮雲起驅寒藉酒壺短牆堆敗葉荒水折寒蘆何處彈  
鴻鈇吾生半阮途悠然還伏枕拙計定江湖

李仙原

字延六 如皋人

月夜懷葉桐初杜田夫

淒涼明月到柴扉獨坐西風萬事非玉笛盡吹關塞曲金砧  
又擣別離衣故人久爲滄江隔清夢時同秋雁飛回憶河梁  
曾有約黃花欲放好相依

邵瑞麟

字昭伯 如皋人

黃仙裳寓齋對雪遲吳吾始張季雅不至

此時僵臥者真不受人憐深巷斷行跡破扉明遠天渴唯敲  
石火寒尙弄冰絃何處乘船客山陰隔暮烟

鄧鼎采

字扶風  
孝威子

九日之東臯省家大人卽寄巢民先生

亦知逢令節客舍倒壺觴可惜猶岐路相思入夕陽夢隨雙  
槳動心逐片雲長寂寞秋江上黃花強自香

鄧邵榮

字若雍  
孝威子

送舒恭之潘村

寂寞柴門路飄然竟放船海風吹野屋湖水接遙天愁思同  
誰語荒齋伴鶴眠應知苦吟客獨立水雲邊

鄧勵秀

字七友  
孝威子

春日登太白酒樓

江連二水合樹壓一樓荒倚檻仙雲入山花酒自香風流真  
絕世飄泊豈緣狂咫尺孤墳在殘碑臥夕陽

吳協姑

字微蘭號松亭如皋貢生著朱隱書屋集盟鷗淑  
偶筆云吳微蘭有與居輔臣說事一首音節最悽

惋詩云曾記當年柳敬亭蕪城秋雨話冷泠六朝多  
少興亡事更向尊前此夜聽殆

國初高尙士也

冬盡

北風吹野岸慘淡暮雲寒山火明殘夜春聲急淺難囊空沽  
酒盡家遠寄書難賴有檐梅好清香伴歲闌

丁行乾

字自公號路嬰謙龍弟早  
卒泰州人詩存云如皋人

揚州

城堞已興廢繁華無盡時荷香侵短棹月影補荒籬歌吹風  
流遠琵琶世態移高原多戰鬼秋氣最堪悲

丁元會

字天叙  
謙龍侄

偶題

十載鬚眉異浮名只自知家貧親易老才短遇難期小閣孤  
燈夜疎窗細雨時每懷千里志拊髀動深悲

丁龍受

字田來泰州人  
詩存云如皋人

寄家漢公白門

朝天宮內羽仙家詞客閒行衣帶霞前代風流賞不盡留君  
獨看海棠花

江允納

字曲江  
通州人

文選樓懷古和阮亭韻

最是登臨易惹愁况經世代復悠悠讀書不見當時侶殘簡  
空傳今日樓斷碣冷烟梁代路寒鐘蕭寺廣陵秋增冰玉輅  
言猶在事往空隨暮水流

魯東銷

字載馨江都貢生善書工畫詩文俱有宗派著偶然集

廣陵野望

當年名勝是誰園今日猶來士女喧  
閣倚平山迷遠樹舟橫野渡入孤村  
六朝佳麗餘蕭寺三月烟花繞華門  
踏遍郊原春草色雙柑何日倒芳樽

王奇遇

字開依通州人

客語溪懷雁

今秋何事雁忘歸細雨涼風木葉稀  
紫塞望餘斜影沒青山吟罷遠書違  
愁經烽火來無日憶別瀟湘淚滿衣  
似爲稻梁南國少甘蒙霜雪老金微

顧九銘

字斯敬江都人

遊金山

北向瓜洲渡南迎鐵甕城塔高如日近水急似山行處處禪  
房靜年年戰鼓鳴何時鯨浪息高倚萬峰晴

王孫驤

字受軒  
泰州人

山行和滄洲韻

遙見雲屯嶺入山不見雲龜蒙連一色齊魯勢平分客路情  
方定村醪氣正醺天涯成聚首誰復怨離羣

開

字本菴  
如皋人

堰口雪夜黃天濤齋中晤孫豹人

臘殘不解還爲客客裏逢君作客同雪積路迷千樹白酒醒  
心折一燈紅剡溪棹繫郵亭外堰口詩成別夢中料得來朝  
增悵望依然渭北與江東

冒禹書

字玉簡鑄錯長子著倩石居遺集盟鷗叙偶筆云  
予過雒畢妙隱丈留宿得全堂出示先世詩文集

數十種鑄錯先生丈之高祖禹書福書誦叔曾祖殷書  
曾祖也一家之內人各有集爲近古罕有桐城方氏其  
庶幾焉

有感

三載燈窗下窮經答

聖明秋風桃葉渡夜雨石頭城

老至憎言別時違多拂情臨岐惟一語待振舊家聲

時送九弟之金陵

陵

冒殷書

字文足號何文諸生鑄錯仲子著梨雨堂春浮集何文居詩存

柳花

日暮佳人莫倚樓萋萋古陌與芳洲纖腰可念眉堪畫一過

青春便白頭

送翁霽堂

小縣水無際青陽八月黃送君朝又雨速我髩成霜貧極朋



情缺老來詩卷忘  
嚙啗未能和威鳳在高岡

舟中和費執御兼寄鄧茗村

君歸吾作客何意共扁舟  
帆破稻花雨蛩喧豆葉秋  
蒹葭遲白露燈火隔揚州  
鄉思多于髮詩成寄鄧攸

題從姪樸人叅戎洗馬圖

錦官萬里亞夫營  
班馬朝同畫角鳴  
老去依然愛神駿  
健兒爲濯一泓清

病中敬步家慈惜蘭元韻

天然九畹絕纖塵  
雨過香生色更新  
忽訝枝頭憔悴甚  
殘花却是病中人

冒福書

字箕疇  
錫爵季子諸生著  
桐蕉書屋詩題齋  
紀年詩

雜詩

逃名固牢騷盜名亦虛足笑非郭林宗人巾折角一墜手

取青紫自顧誰得以那知天地閒儘有遼東豕二殺身報知

已前言猶在耳一朝忽我離金盡誰國士三孤芳羨芝蘭且

恐桃李逼那堪空谷中此日生荆棘四凡馬驚嘶終日氣

凋喪舉肥豈有心舍此不能相五烈士嘗感恩傑士每忍訴

恩重訴可忘屋皆報何陋六良玉必終識深山那能匿豈有

命世才置棄甘偏七

冒志同字子野如皋諸生

### 淮陰侯墓

滅頂曾傳百戰功千秋宜恨未央宮殺身總是由蕭相垂死

徒教憶蒯通枕畔烏啼愁落日嶺頭雲起結悲風英雄儘有

藏弓懼幾見山河誓始終

冒廷驥

字攀雲號江村如皋貢生

三台晚眺

三台負絕處突兀傍層霄遠望依天近臨風寄興遙  
暝烟催去鳥落日數歸樵放眼乾坤外予懷正廓寥

冒廷駒

字維嘉如皋監生殖學敦行士林私謚文清先生著慶餘堂集

和吳坤庵表兄喜得阿仲蜀中書

經年方得買歸航遙憶詩人減卻狂  
萬里驚心來劍閣幾番回首醉高陽  
他鄉琴瑟牽情遠故國鶯花引興長  
兩地關山休悵望霜前佳景雁成行

冒

嶠

字銳峯號椒北如皋人雍正乙卯舉人

宿遷道上口占

離家八百里作客一旬餘  
久覺詩書賤偏驚歲月除  
暮林還

倦鳥驛路遡歸車獨有長征者經年總自如

冒春林

字上苑號寄亭如臯諸生著寄亭集上苑讀書焦山故有年年燈火焦山客之句

焦山送內兄喬枝歸里

送爾揚州路使我百感生欲歸歸未得欲別難爲情忍淚強  
揮手江頭淚已傾爲我語兒女勿使念遠行但云此間樂甘  
心薤菜羹

午日同家甚園賦

潮空濛雨似秋霖蒲酒惟宜爾共斟但是芳辰俱寺館曾無  
令節不山林欻歔欲奏雍門曲憔悴真成楚澤吟醉後相攜  
江上立魚書望斷故鄉音

冒車書

字富五號硯癖泰州人

秋興

幾縷秋烟一抹霞空堦涼雨似山家常憂來日不相得詎是我生真有涯徑遶林臯封落葉宅連雉堞亂歸雅候蟲也似知遲暮鳴過牆陰藕豆花

吟山數葉且留餘猶記成童佩鞶初王謝弟兄過絡繹崖廬

兒女笑軒渠蓼花水齧中丞墓柿葉聲寒開府墟先中丞廬素後家于

海陵遂葬焉吏部遺書亦寥落先吏部藏書亦散失我姑飽食到華胥

冒漢書字七齋號小山泰州人

### 過家上苑

鶯聲三月盡得此倚闌干江柳晚烟重梨花春夢寒芳時真不再佳句得來難殊愧故人意殷勤致一餐

冒春榮

字含山號菴原一號花源漁長義元五世孫諸生著紫翠閣秋萍集紀游草含山才思騷雅格調整

秀江左詞壇推爲眉目洵冒氏之美也與鮑海門齊名又與邑人姜靜宇稱姜冒

送言倚枌歸仁和

我亦思歸劇何堪送爾歸半生爲客賤萬事出門非境寂憎  
蟬噪心忙羨鳥飛何時村舍米羹外負斜暉

暮泊清河縣北村

起此一帆落來尋野渡頭黃河橫北望白日莽西流飄及餘  
荒廟浮雲自古邱乍寒風漸厲尙有敝羊裘

夫差廟

一戰夫椒拓霸圖東南誰不畏強吳父讎未報美人至敵國  
尙存謀士誅廢苑春來花自發空庭月落鳥相呼靈旗畫鼓  
村農社會比當年歌舞無

壬子大水謠

壬子年水泖泖波心種樹屋上采蓮  
屋沒無脊雞上樹鳴

魚躍入釜灶不得烹 灶不得烹兒不得飽兒飢猶可母年  
已老

抹鴈花

美人攬青鏡 鬢華飾簪珥 鬢髮黑如漆 香雪散牀第 朱門一  
夕花貧家三日米

驥江僧舍喜方鄉三夜話

古道憑誰問 交情賴爾真 一燈雙酒盞 四海兩愁人 託命同  
磨蝎 吾生更苦辛 非關怨遲暮 何以慰長貧

顧野王書臺故址

華陽有真隱 曾此卜居來 古宅惟流水 閑門自碧苔 鳥啼千  
嶂嶺 春老百花開 不改雙峯色 寒烟滿石臺

同彭晉函

澤令

王賀堂

世求

舟泊燕子磯 喜遇崇明李

鴻珊

尚美

上海蔡朴夫敦華亭繆學山孟烈元和韓伯

慧佩

祥

諸子晚眺

秣陵先去客風雨阻扁舟已別復相遇同登江上樓夕陽收  
遠浦孤嶼帶寒流須飲千分酒高歌可唱酬

暮過韜光寺

一逕入青竹眾山浮晚烟林深畱宿雨澗曲咽寒泉石磬驚  
僧定花龕坐夜禪三年曾有約願就小樓眠

惆悵詞

冶游記得似蘇隄多少垂楊檻外齊只有暮鴉三四點正懷  
人處一聲啼

張

朝

字山未曉心齋新安監生督學黃嶽子因亂奉父

遷江都校點寡言笑恂恂訥訥弱不勝衣而好古  
甚篤博覽穿穴著述  
數十種爲藝苑所宗



送程山尊歸里

我亦新安人移家廣陵住幸君時來游風雨常懽聚把酒甘  
四橋賦詩索奇句復羨諸名流紛紛竹西寓奚爲戀故鄉竟  
作歸田賦勸君君不聞毋乃烟霞錮

王箴輿

字敬倚號孟亭寶應人式丹孫康熙壬辰進士官河南歸德府著編年詩

見荆花寄三弟

一春昆弟隔天涯春到東湖夢到家不爲見花方憶汝恰緣  
憶汝正開花

王箴翼

字米戒一字栗亭箴輿弟著洗心齋宛洛吟在草原草金粟亭諸集

重九後余南歸朱青島以詩贈行

客牀風雨共飄零聚散天涯幾葉萍宛洛從教遊戲徧雙眸  
能白亦能青

解

謙字志林  
興化人

輓外舅吳柴菴相國

中原文獻總凋殘  
碩果凌霜幾歲寒  
一片白雲歸碧落  
五朝青史舊黃冠

容高沙歸不及別李楷士

看花何事夜忘歸  
有客宵征賦式微  
城郭不堪回首去  
行藏何自與心違  
垂楊繫纜停沙久  
異燕依人傍水飛  
咫尺天涯君不見  
片帆東下又斜暉

萬

卷字二酉  
更名山號登燭江都人

遊洪山寺

策蹇東郊興不孤  
攜樽藉草共踟蹰  
霧迷芳樹疑分合  
雲帶青峯半有無  
家隔烟波鄉思遠  
人當山水客情殊  
陌頭春色

牽離恨歸路何堪叫鷓鴣

顧子觀

字萬峯號淵陸興化諸生著解陸集羣雅集萬峯

與鄭板橋李復堂幼即負物望稱楚陽三才子萬

峯詩蒼勁沉鬱雄渾高秀具唐人風格孫荻山謂爲宋

元以來名家可與頡頏者且無多人推許至矣楚陽百

年求詩學

當誰是人

速成

同道異志厥近先臻同火異氣質薄先溫同學異就力小先  
成蒲葦之生捷於松栢雞狗先行入鈍於畜鳳凰和鳴天下  
文明河圖之出聖哲殫心孰謂大人而出能輕敬誠後生無  
庸速成

青山歌

李白  
葬處

朝青山暮青山青山秀色滿人間李白之骨化爲水還餘清  
氣飛爲嵐君不見朝朝山上吐青蓮又不見夜夜山下鳴清

泉泉聲萬派歸滄海蓮花飛去青山在吹龍笙擊鼉鼓激清  
歌揚妙舞搖青龍鞭白虎何事方春卻又秋令人無今不成  
古與君試誦青蓮詩青蓮騎鶴下來遲一樽酹與青山土芳  
草無言綠似絲

懷宋幼堅

記得湖船解纜時七年前是別君期關山月冷南飛夢縱到  
君前君不知

將進酒

將進酒悽以悲須我友起徘徊白日欲匿英雄難爲明月在  
手清光與誰登泰岱涉河淮窮九疑歷峨嵋泛渤海行邊郵  
長太息空來歸左拔雄劍右揮金杯有酒獨酌不快意丈夫  
意氣雷風飛

途中雜詩

王通敏云詩徵誤作一首

長途盈積雪曉寒念童僕酸風墮殘月見馬冰生腹馬寒人  
何堪馬嘶人肅肅聚焚燒空林人窮笑如哭眉上霜初融與  
淚淫於目獨我在車中狐裘豹衾複豈敢道艱辛祇慚才鹿

凝陰蟄朝光日出寒屈強不見霜飛來霜華滿衣裳寒急下  
車走肢勞氣方益傭食無衣人負荷雪中往得食腹無枵得  
勤體亦養逸以戕其生吾懲昔者罔

### 月夜江行

孤舟觸月走江烟潮漲芳洲綠似錢雲水止憑山作界魚龍  
應以夜爲天樓船簫管商人婦白露蒹葭處士田我自寸心  
懸碧落任風吹去不須還

德舟曉發

關河秋盡客衣輕一月慈親夢裏行水過平原還北向雁來  
沙漠總南征寸心渺渺同千里暮雨蕭蕭送此生何日扁舟  
到茅屋舉家相見淚同傾

計道章

字開如江都人承家孫  
冒歸子康熙辛卯舉人

平山堂餞聞首章

寒城平楚正蒼蒼攜手言尋六一堂剛到相逢筵是別近緣  
多恨酒能狂溪邊閒立依鷗隊天末離羣感雁行指爪雪痕  
渾不定題襟好好寄雷塘

程

崧字平川江都人歙縣籍康熙  
癸巳進士官刑部郎中

題因樹檼

有杏一株而母所植檼因樹構樹爲庭得方耀其華護委堂

北樓日以摧樹日以熄嗟哉孝子中心惋惻天實眷之恨茲  
潛拆傑閣重開喬柯百尺春露秋霜花時月夕載詠載歌式  
飲式食碎錦坊成用綿先澤

蔣繼搏

字宋徵號蓮峯江都諸生著蓮峯第一集

春郊野望

春風草色遠孤村楊柳桃花總斷魂聞道故人居此處小橋  
東去有柴門

蔣繼修

字平山號愛廬江都人康熙甲午舉人

平山堂春眺

青山不斷野雲遮六一堂開映晚霞蜀嶺千重迷蔓草揚州  
二月醉烟花晴郊燕拂遊人扇落日僧歸帝子家憑倚朱欄  
無限恨竹林深處有栖鴉

陳夢乙

字子翼江都人著解醒奈何廢蓼秋香  
秋興偶然攻玉思暑狂言北遊十集

客燕中有懷江都竹枝詞

此日家鄉景正妍  
單羅衣試暮春天  
野人初熟青蒿酒  
遊女閒歌白苧篇

第六泉鄰第二泉  
茗芽初試石鑪烟  
管絃共逐歌聲沸  
廿四橋頭月正圓

蔣斯行

字存恕江都人

過北禪堂與法涵二上人茶話

路北遺僧舍相過  
意頓清欲窮無我  
相肯逐世間名花  
雨原空際茶瓜豈  
俗情徘徊下忍去  
歸路繞鐘聲

須秉真

字元恒江都人

送汪悔齋太史



玉堂聲價重瀛洲萬里風雲擁節遊時太史適有出使琉球之役

御藻絲綸光九服中山屏翰壯千秋潮聲入夜浮銀漢劍氣

隨槎到斗牛一白鳳麟馳遠譽已知姓字覆金甌

李長順字天助高郵人

九日雨同陳學士登文遊臺陳士振許天植不至

此日登臨興倍豪長湖風雨片帆遙一尊花瘦開清嘯古樹  
聲寒急暮潮不信經年更盜賊每譚往蹟讓漁樵蒼茫四望  
城陰迥人隱蘆中未可招

郭士璟字飲霞號眉樞涇陽人江都籍康熙乙未進士由主政權稅江川清風高節不下古人乞歸閉門卻

掃廬詩自怡聖祖南巡時書泉石怡情額賜之

舟中聞笛

月明沙淨客停舟一笛吹來江上樓未識瀟湘應有怨偶依

楊柳便思秋聲隨遠浦漁歌細調入寒雲碧澗流聽罷夜深  
衣露濕蓼花蓮葉總含愁

鄭爲旭

方旦號曉齋江都人元化子貢生官至御史卒祀鄉賢祠王少村云御史多建白知選官須加驗

有視學應道詞臣申請讀律令之條以厚民俗分進士舉貢班次以疏銓政飭臬司遇命案不得率結罪人等疏俱次

第舉行

送汪悔齋太史出使琉球

長安五載共依依惜別欣看四壯騁麟服映雲臨海甸鶴書

自

綸屏手傳

聖藻承

宸眷口達

天言布德威此去正同張博望仙槎應許度支機

白海棠

幽姿偏自愛黃昏深苑無人靜掩門幾點牆陰弄秋色月明  
疑有美人魂

鄭爲春

字楚木  
江都人

集巢民齋中次鄧柳下韻

夙有剡溪興今因御李來  
招朋供野蔌分火及寒灰  
亭以枕烟碧池還洗鉢  
開名園如栗里遯世惜奇才

蔣繼昉

字猶龍號擔壘江都人  
康熙丁酉舉人

題蜀道圖

春流細浪岷江遠日落前峯雪  
嶺孤酒肆琴臺俱寂寞詩人  
猶自愛成都

劍閣峻嶒蜀道長猿聲鵲淚總  
淒涼浣花箋紙郵筒酒只供  
遊人弔夕陽

陳瑤笈

字丹文  
秦川人

壬戌孟冬巢民先生招諸名賢四十九人海陵燕集

標置龍門逸典賒頻年結納遍天涯飛觴不異蘭亭會同倚  
高樓看落霞

陳志泰

字玉調江都人康熙丁酉舉人官鳳山縣知縣

題因樹樓

邗溝傳名勝共仰因樹樓樓因樹乃建樹以母斯留昔時版  
輿樂今成桑榆憂興廢等閑事思親成白頭孫曾看式鵠六  
籍窮探搜揚抗母貽訓高節著柏舟

任立已

字卓爾自吳江遷高郵康熙庚子舉人著惜樹草堂集

拜祖墓

昔時我祖墓青山四十年來一瞬間今拜墓前揮涕淚可憐  
孫鬢已全斑

李四載

字奠九號穎菴如皋人康熙庚子順天舉人著介初堂詩賦遺集餘閒堂詩

甲仗樓

謝傳樓高俯郡河  
閒來登眺運籌多  
墅開碁局初爭劫  
鶴唳秦軍已倒戈  
北地金笳悲夜月  
東山絲竹醉烟蘿  
入公草木皆兵日  
席卷中原意若何

樊敏政

字韋齋號子從江都貢生著西山堂集

懷胡西垞

別後書來問慰頻  
蓼花蘆葉共傷神  
白頭江海浮孤艇  
青眼風塵得幾人  
野雀自來無定所  
沙鷗隨處可相親  
水窗正值秋光好  
庾信詩篇老更新

方挺

字恂如號孺菴江都諸生恂如然若虛其集族兄雪岷爲付梓

侍御許青嶼暨松年夫子偕周東曾許文侯南交胡修

來飲黃仙裳齋

車笠天涯愜素心况當聯袂恣幽尋少微占叶光河嶽大雅  
風流擅古今秋晚平林雙劍冷霜寒老屋一燈深良朋不負  
今宵約空谷西風有足音

郡伯崔夫子榮擢運憲

記得兒童竹馬迎六年邗上治功成鳳鸞此日頻相集狐鼠  
深山不敢行錦帳月明官閣夢玉壺花氣更人情懸知秋燠  
堂簾下依舊長廊海鶴鳴

李

堅

字不磷江都人幼失怙恃力學勵行重然諾落落有遠懷

焦山雪霽熊偉男偕兩弟過訪

何意天方霽正逢羣彥來雪封閒剝啄逕險耐徘徊覲面先  
分笑支筇且看梅東冷泉畔坐落日半江開

儲

澐

字山濤泰州貢生官含山訓導文懿元孫著霞起樓詩文集

咏史

漢帝得天下豁達異凡主區區斬蛇事荒誕何足數迂哉劉  
寄奴奮迹起行伍權力挾天子恐爲眾所阻詐言新州蛇擊  
斬類高祖皇天眷有德符瑞自非古茂陵封禪書三代棄如  
土

登大觀樓同黃交三趙憲吉澄鑑賦

天氣晴明曙色開危樓高聳踞江臺雲迷樹杪潮聲亂窗對  
沙洲日影來豪俠久埋橫槊志風流空負濟川才湖山閱歷  
從茲始好友啣杯亦快哉

吳爲瀚

字紫瀾號頤軒江都人康熙庚子舉人著摘軒集

議復保障湖舊蹟

揚州素沃野保障鍾地利高下足灌輸山農樂遺穗不知始

何人決防成廢棄龜圻故道迷目斷淪漣翠綿芊菰芹芽野  
蒿雜排次嗟哉千頃流興替匪細事大功斷乃成要當急圖  
始請上良有司續彼河渠志

顏光祚

字佳醕晉人遷居如皋與吳  
梅村朱真人交篤著詩畧

冒園讌會

蘊玉非一山潛珠非一淵志士期大業粹美在羣賢濟濟名  
園會翳翳春雲還柔條敷以榮遊鱗明且鮮何況在野人置  
酒列綺筵拳石旣云美小山亦有泉顧步眩流景振衣生紫  
烟興言互激越醉舞各仙仙應劉不足陳屈賈有共愆同心  
齊所願幽憤亦旣宣顧念雙飛龍天路有迤邐愧此雙屈人  
尺水自安然誰云歡在朝長夜悲撫絃何如托衡闌繁翰寄  
斯篇



贈石夏宗

皓天積陰羈嘉樹落荒邱迢遙九衢內屏翳若龍遊俛仰起  
悲風歸路無所由自非希世哲躡景難自謀振衣彩虹外灌  
漑長江流還顧淮南桂馨香樂我儔願得長相依榮悴復何  
求

俞元燈

號牧隱泰州人著南遊草

歸家後述懷

楓岸停舟夕照斜一肩行李問生涯多因宦薄難爲客纔聽  
年荒怕到家短榻半經蛛結網殘籬猶有菊開花市爐分餅  
知同棹便是更深酒可賒

劍南詩市爐分熟通賒酒

蔣嘉會

字次葵號蘇門江都人著蘇門四草

莫羅燕

燕雙飛遠玳梁出君幃處君堂新花不染泥舊巢那得香銜  
泥卵已生巢成雛已出子子孫孫託君家羅我輕軀復何益  
范 宣 字祇承號栗園如皋人諸生萬竹友云栗園家有  
春草地塘與同邑劉雍州陽羨徐霽月爲文社友  
過辟疆園

司理琴尊地登臨事已非名園成棄地亂石冷斜暉盜賊攀  
蘿薦兒童採蕨蔽廢興天意在聊復坐漁磯

金

麟字禹長號栢  
庵江都貢生

### 送涂子山還豫章

旅食因人久衰年始倦遊故鄉遙在目襖被已驚秋戰伐餘  
青嶂親朋盡白頭匡廬多勝境策杖問丹邱

### 清明酌亡友余生生墓

先朝耆舊劍南才遠寄天涯土一堆壠上斷雲春草暗林間

落日晚花開長年寒食親朋淚異國孤墳狐兔哀禪智山前  
多古墓誰將麥飯灑泉臺

野外鶯花入暮春生芻來薦錦城人一杯濁酒千行淚三尺  
孤墳萬里身石碣新題留處土金輿舊從憶羈臣蜀岡草長  
烟光暝聽盡啼鵑倍慘神

送雙臣弟遊楚

春帆一片挂斜暉遙向天門望翠微作客不辭千里去思家  
尙憶隔年歸新烟寒食山花滿細雨滄江野鷺飛離別獨深  
芳草恨楚雲吳月兩依依

馬曰湘字熊山號荆江康熙庚子舉人  
官保康知縣遷工部司主事

罷虞衡作

宦途歲月暗中遷望入光陰到眼前葵藿猶思依

聖主桑榆爭奈逼殘年署名驚尾供常職慵走螭頭愧衆賢  
載咏伐檀身引退免教虛受大官錢

張

韻

字諧石號浮邱江都人受知  
相國宋參天著城東草堂集

東鄧孝威

風雨高樓戶不扃廣川祠作子雲亭廿年交誼頭先白一輩  
詩人眼獨青江草江花時取醉春城春寺路初經愁中得句  
須頻寄我屋郊原空翠屏

九日讌集平山堂

平山堂上有高樓此日登臨憶舊遊碧柳已凋隋苑路黃花  
猶放故園秋遠峰挹翠來京口野客揮毫弔石頭醉裏西風  
凝望眼江雲塞雁總悠悠

蘇

卓

字立原蘇州人如皋  
籍著笈鳳軒偶吟

重泊惠山遊泰園

北風重繫惠山舟爲訪名園足勝遊  
幾處小橋通曲沼千章喬木擁高樓  
泉聲細向雲根出磴道時依鶴步求  
坐久不聞人語聒應知此地卽丹邱

黃泰來

字交三仙裳子梅岑婿好讀書嘗謂古人不難明  
患不立志耳所選詩傳刪除俗調著岱青樓集評

香閣七律觀  
海集洗花詞

將有洞庭之游蔡右宣程言遠以詩相送援筆答之

我聞洞庭之山七十二峯高嵯峨洞天福地何其多東西對峙青巖巖上有姑射絕世之仙娥餐霞吸露匪朝夕光華日月相摩挲仙人夜吹白玉笛胡麻麟脯能留客長嘯一聲千壑驚水晶宮殿銀蟾白吁嗟此境不易登千家橘柚垂層層丹邱在人境仙子憑虛升上有蓮花放千葉高呼帝座如可

應蒼虬赤鯉竟何處  
花落花開自朝暮  
蓬瀛清淺路不通  
女床又長相思樹  
烟中縹緲看若無  
玉几珠簾隔紅霧  
銀河倒瀉摘星樓  
天香滿袖劉郎渡  
欲攜二客訪芝庭  
具區湖水如東溟  
麻姑勸我展莫停  
神仙自古忘其形  
洞中仙子久相待  
俗眼惟見洞庭之  
山點點湖中青

游花谿懷東海夫子兼東龔含五先生

花谿昔爲安道宅  
千箇黃鸝叫深碧  
江左風流今尙存  
玉峯夫子追前迹  
卽地便爲綠野園  
臺榭參差最開闢  
胸中五岳任意生  
眼底天池隨步得  
登峯造極無以加  
曲磴懸崖幾百尺  
始知會心不在遠  
邱壑從來屬安石  
文章德業亘古無  
榮光夜映台星白  
瀛臺侍宴瓊花朝  
太液揮毫珠樹夕  
分明身在閩風中  
玉宇晶樓紙常擘  
柏梁和罷又芝房  
天馬大風廣

瑤席名園晝閉午橋莊落紅滿徑蒼苔積濠濮游魚自得情  
野鹿能迎山客屐白雲來往自無心春秋閒却東山奕珠江  
有客歸未能一榻高樓愛幽僻十年心慕始相逢投閒那久  
棲巖隙傾談共念玉峯師一代儒臣聲望赫猶憶廣陵初識  
荆陽羨陳君話疇昔紅豆歌成恨未終標置蒙公爲鞭策門  
墻萬仞總難窺雲泥北眺江湖隔菰蘆抱膝祇長吟撫景無  
端空自惜花谿桃李千萬株飄蓬我作滄浪客

虎邱謁蔡忠襄公祠

蔡公忠烈超千古晉陽百戰缺戕斧猛士相從盡致身白日  
黃沙捲旗鼓憶在鼎湖十八春羣盜如毛塞寰宇中原千里  
無人烟處處堅城逼樓櫓秦中拱手失函關赤眉百萬號豺  
虎臨邊將士心膽寒寶玉紅顏恣賊取須臾一葦渡黃流太

行搖動擎天柱中丞竭厥命出師裨將彎弓石沒羽摧鋒入  
陳屢敗之賊勢遮天壓城府兵盡矢窮潛上疏孤臣力盡負  
英主城破仍聞巷戰聲三立祠前鵬鳥舞投環又有盛將軍  
國難偕亡慚部伍孔明陣裏將星流宗澤營邊忠鬼苦生爲  
柱國死明神今日酬功立兩廡湯公遍焚淫祀多改作公祠  
亦英武吁嗟當日失廟謨掣肘封疆用閹豎緋衣常侍講孫  
吳坐失事機由莽鹵寧武關前塞草黃英雄血淚傾如雨大  
璫反爲賊元勳九門迎罷開宮戶此輩平時挾主威臨危授  
命誰堪數中丞鐵漢睢陽風國耻未雪埋黃土只今祠廟虎  
邱山忠魂夜作胥潮怒

饒

詹

字白眉江都人與夏次功徐辰  
玉同爲阮亭所特賞著芝山集

送宗定九還東原



東原六十里幾度送君還楊柳春風岸芙蓉秋水灣城中常  
不到野外得高閒羨煞幽居好吟詩萬竹閒